


TEZAU LITURGIC

23 MARTIE

**SLUJBA
SF.CUVIOASE
ELENA
BEHTEEVA
DE LA
KIEVO-FLOROVSK**



MOSCOVA, 2000



СЛУЖБА **преподобной матери** **Елене Киево-Флоровской**

НА ВЕЛИЦЕЙ ВЕЧЕРНИ

На Господи, возвах: стихиры на 8, глас 4:

Днесь возсия нам пресветлая память твоя, /
Елено Богомудрая, / матери инокиням, Христова
невесто, / ученьми святителя Тихона Задонского
воспитана, / землю Русскую чудесы своими
просветила еси, / силою Духа Святаго
просвещенна, / Егоже моли о творящих любовью
память твою.

Приидите, вернии, / песньми хвалебными
почтим преподобную Елену, / присную о нас к
Богу молитвенницу, / Воронежския земли
преславное прозябение, / града Киева покров и
верное охранение, / обители Флоровския
богодарованное сокровище / и всем христианом
скорое вспоможение и заступление.

Преподобная матери Елено, / твоя преславная
память постникам украшение, / твоим бо
житием чудес Христос благодать дарует / с
верою приходящим к раце мощей твоих, /
Егоже моли даровати душам нашим / мир и
велию милость.

Земную славу и красная мира презрела еси, /

достоблаженная мати Елено, / острою одеялася
еси власяницею, / странствия, гонения и
болезни претерпела еси / будущего ради
наслаждения, / еже ныне получивши / и
Престолу Владыхи Христа предстоящи, / помяни
и нас, мати преподобная.

Ины стихиры, глас 2:

Девства чистотою украсивши душу твою, /
преподобная мати Елено, / благородство
плотское усугубила еси душевною красотою, / со
свечельником горящим возшла еси во дворы
Господа твоего, / Егоже моли непрестанно, / да
и мы сподобимся причтени быти к лику
избранных Его.

Заповеди Господни от юности возлюбивши, /
досточудная мати Елено, / многим была еси
наставница монашеского жития, / многи ко
Христу привела еси; / темже днесь празднующе
всечестную память твою, / возхваляем Бога,
прославляющего святых Своих.

Преподобная мати Елено, / ни кая скорбь
возможе отлучити тя от любви Христовы: / ни
гонения, ни странствия, ни крова лишение, / ни
злоба бесовская, ни зависть человеческая - / вся
сия претерпевши, / очистилася еси от
привременных, яко злато в горниле, / и
духовными дарми обогатилася еси,

достоблаженная, / от тех подаючи нам велия милости.

Радостно совершающе память твою, /
преподобная мати Елено, / прославляем дивныя подвиги твоя, / на молитвенный покров твой уповаем, / исцеления душевная и телесная приемлем, / Христа непрестанно величающе.

Слава, глас 1:

Возвеличаем днесь, вернии, всеблаженную Елену, / сия бо от младенства Христову красоту возлюбила еси, / наученьми Задонскаго святителя Тихона утверждаема, / духовною пищею насладитися паче всех вождедела еси, / земныя красоты не восхотела еси, / и бысть Небесным Силам собеседница, / с ними же ныне у Престола Божия ликовствующе, / молится о всех почитающих святую память ея.

И ныне, Богородичен: Всемирную славу:

Вход. Прокимен дня и чтения 3
преподобническаго.

На литии схира, глас 5.

Подобен: Радуйся:

Радуйся, преподобная мати, / в скорбех утешительница скорая, / в напастех помощница, / болезней всечудная целительница, / призри днесь на моления наша / и прилежно

молися Христу Богу / даровати нам мир и велию милость.

Слава, глас и подобен тойже:

Радуйся, блаженная мати Елено, / жилище Духа Святаго, / сосуде избранный Божия благодати, / настави всех нас ходити путем Христовым / и приклони днесь к гласом хвалебным, / имиже чествуем святую память твою, / и помяни нас в молитвах твоих ко Господу, / и испроси нам у благодати Его велию милость.

И ныне, Богородичен, глас и подобен тойже:

Радуйся, пророческая печате / и богогласных апостолов проповедание: / Бога бо воистину сущаго воплощена, / паче ума и слова родила еси, Чистая, / Имже первое восприимше благородие / и райския пищи наслаждающися, / Тебе ходатаицу таковыя светлости / и молитвенницу благоприятну песньми почитаем. / Тобою, Пречистая, обогатившися, / присносущныя сподобляемся жизни Сына Твоего, / подающаго богато велию милость.

На стиховне стихиры, глас 2.

Подобен: Доме Евфрафов:

Дом и жилище / Пресвятому Духу / была еси, мати Елено, / просветивши свою душу / благодатию Утешителя.

Стих: Честна пред Господем / смерть

преподобных Его.

Прославим, вернии, / иже во граде Киеве /
Богомудрую Елену, / нищетою духовною /
благодать Господню стяжавшую.

Стих: Что воздам Господеви о всех, / яже
воздаде ми?

Молитвою и терпением, / паче же ко Господу
любовию / стяжала еси дарования духовная, /
чудесами украсившись, / мати Елено
блаженная.

Слава, глас и подобен тойже:

Услыши наша моления, / преподобная мати
Елено, / любовь к тебе прибегающих, / и
сердечная подавай прошения / чтущим святую
память твою.

И ныне, Богородичен, глас и подобен тойже:
Прославляем Тя, Пресвятая Дево, / во удел Свой
Киев-град избравшую / и сонм святых в нем ко
Христу приведшую, / с ними же Елену
пречудную, / юже днесь всечестно ублажаем.

Тропарь, глас 1:

От юности нищету Христову возлюбивши / и
крест скорбей и странствий восприимши, /
славу и богатство нивчтоже вменила еси, /
Богомудрая мати Елено, / моли Христа Бога /
спастися душам нашим.

НА УТРЕНИ

На Бог Господь: тропарь преподобной, дважды.
Слава, и ныне: Гавриилу вещавшу:

По 1-м стихословии седелаен, глас 3:
Днесь призывает нас обретение честных мощей твоих, / преподобная мати Елено, / светло праздновати память твою, / днесь вси людие веселятся, / приимше тя заступницу пред Господем. / Ты же, о блаженная, молися о нас, / верою и любовью тя почитающих.

Слава, и ныне, Богородичен:
Свет, от Света исходяй, во Твою Девичу утробу вниде / и плотию обложися недомысленно и несказанно, / рождеством же Его вся тварь обновися и идольская лесьть разорися. / Тем молим Тя, Пречистая: / моли, да спасет души наша.

По 2-м стихословии седален, глас 7:
Доблественне Богу работавши, / злокозненного врага низложила еси / и в терпении мнозе земное житие препроводила еси, / преподобная мати Елено, / и ныне радостно предстоиши Престолу Господню, / молящися о всех нас.

Слава, и ныне, Богородичен:
Труждает мя буря греховная / и возмущение безместных помышлений: / умиლოსердися,

Всенепорочная, / и руку помощи, яко
Милосердная, простри ми, / да величаю Тя,
спасаемый.

Величание:

Ублажаем тя, / преподобная мати Елено, / и
чтим святую память твою, / ты бо молиши о нас
/ Христа, Бога нашего.

Псалом избранный:

1. Терпя потерпех Господа, и внят ми, и услыша
молитву мою. 2. Бог нам Прибежище и Сила,
Помощник в скорбех, обретших ны зело. 1.
Многи скорби праведным и от всех их избавит я
Господь. 2. Приведутся Царю девы, приведутся
в веселии и радовании. 1. Девы да восхвалят
имя Господне. 2. Пролию пред Ним моление мое,
печаль мою пред Ним возведу. 1. Колена моя
изнемогосте от поста, и плоть моя изменися елей
ради. 2. Утрудихся воздыханием моим, слезами
постелю мою омочу. 1. Се удалихся, бегая, и
водворихся в пустыни, чаях Бога, спасающего
мя. 2. Сеюции слезами радостию пожнут.

По полиелеи седален, глас 8:

Всеславная Христова невесто, Елено
преблаженная, / постническими подвиги
своими / все плотское мудрование умертвивши,
/ всякими добродетельми украсила еси житие

твое / и к Богу дерзновение стяжала еси, /
Емуже прилежно молися / помиловатися душам
нашим.

Слава, и ныне, Богородичен:
Тя надежду, прибежище и Предстательницу
обретше, вернии, / к Тебе притекаем и
прилежно вопием: / помилуй, Богородице, на Тя
уповающия / и прегрешений оставление нам
испроси / молитвами Твоими, Пречистая.

Степенна, 1-й антифон 4-го гласа.
Прокимен, глас 4: Восхвалятся преподобнии во
славе / и возрадуются на ложах своих. Стих:
Воспойте Господеви песнь нову, / яко дивна
сотвори Господь.

Всякое дыхание: Евангелие от Матфея, зачало
104.

По 50-м псалме стихира, глас 6:
Приидите, вси чистоты рачителие, / согласно
воспоим Елену преславную: / издетска бо
возлюбивши чистоту, / непорочное девства
сокровище сохранила есть, / телесную красоту
постническими труды увядивши, / душу же
украшивши благообразием добродетелей. /
Темже ангельски на земли поживши / и во гробе
наставника своего святителя Тихона
упокоившеся, / со Ангелы ныне ликует в
обителях Небесных / и молится о душах наших.

Канон Богородицы со ирмосом на 6 и преподобной канон на 8, глас 2.

Песнь 1

*Ирмос: Грядите, людие, / поим песнь Христу
Богу, / раздельшему море, / и наставльшему
люди, яже изведе из работы египетския, / яко
прославися.*

Прославляюще Господа, усты немолчными
восхвалим днесь Елену блаженную, средь
земнаго суетства Небесныя славы взыскавшую и
в Царствии Христовом ныне о нас молящуюся.
Родительский дом в юности оставила еси, мати
преподобная Елено, и сокрылася еси от метежа
мирскаго во обители Господней, желанием всем
и тщанием обратившися ко единому Содетелю.
Исполнилася еси, мати, Божественнаго Духа и,
яко свеща от свечи воспламенилася еси огнем
любви ко Господу от души наставника твоего
святителя Тихона Задонскаго, земное презревши
и на Небесное взираючи.

Богородичен: Светлыми лучами Твоего Сына,
Богородице, просвети омраченную мою душу,
страстей смущение отжени, Твоими, Чистая,
ходатайствы.

Песнь 3

*Ирмос: На камени мя веры утвердив, /
разширил еси уста моя на враги моя. /
Возвесели бо ся дух мой, внегда пети: / несть
свят, якоже Бог наш, / и несть праведен паче
Тебе, Господи.*

Небесная возлюбивши, вся красная мира сего
оставила еси, преподобная, и, во обитель
вселиши, неленостными труды постничества
Богу угодила еси, Елено славная. Егоже моли
спастися душам нашим.

Огнем божественных любве и благодатию
Святаго Духа вопитавши, на высоту
добродетелей востекла еси, мати Елено
всечудная, ихже стезею шествовати и нас
укрепи молитвами твоими.

Шествовала еси, мати, узким путем терпения
скорбей и лишений многих, благодарно и
радостно воспевающе Спасителю твоему: несть
свят, якоже Бог наш, и несть праведен паче
Тебе, Господи.

Богородичен: Прогоняющее оружие грехи и
страсти души моя буди, Дево, и покажи мя,
якоже другой рай, безнаветен и соблюден Тобою
и приносящий цветы Духа.

Седален, глас 3:

Явилася еси, мати преподобная Елено, / во
граде Киеве, яко солнце иное, / озаряющи
верных лучами чудес твоих / и исцеления
подаючи всем, с верою приходящим к тебе / и
мощем твоим кланяющимся, и вопиющим ти: /
радуйся, в мире благочестно живущих похвало и
монашествующих украшение.

Слава, и ныне, Богородичен:

Пречистыя Твои руце, Дево Мати, простерши, /
покрый уповающие на Тя и к Сыну Твоему
зовущия: / всем подаждь, Христе, Твоя милости.

Песнь 4

*Ирмос: Пришел еси от Девы, / не ходатай, ни
Ангел, / но Сам, Господи, воплощся, / и спасл еси
всего мя человека. / Тем зову Ти: / слава силе
Твоей, Господи.*

Евангельским словесем внемлющи, крест
иноческаго жития на рамена твоя воспріяла еси
и Христу последовала еси усердно, мати Елено,
инокиням наставница явилася еси,
преподобная.

Нищету самовольну Христа ради стяжала еси,
едино сокровище в житии имела еси, мати
преподобная, - гроб святителя Тихона, и
едиными добродетельми богатеючи.

Имеючи ум, безстрастием просвещен, мати

Богомудрая Елено, Божественным смирением украшаема, дарования духовная прияла еси отгоняти духи и разрешати недуги, верою чтущим тя.

Богородичен: Возсия из утробы Твоея, Отроковице Неискусобрачная, Отчее сияние - Христос, и просвети вселенную, распинаемь, и бесовскую тьму потребил есть.

Песнь 5

Ирмос: Света подателю и веков Творче, Господи, / во свете Твоих повелений настави нас; / разве бо Тебе иного бога не знаем.

Ежечастно волнами житейскими погружаемы и бурю искушений потопляемы, к тебе, мати Елено, прибегаем и тепле вопием: испроси у Бога душам нашим мир и спасение.

Изволением Божиим, яко сокровище многоценное, нетлением процветшия мощи твоя в земли обретошася, Елено святая, от них же подаеши всем богатая исцеления.

Любовию Божественною сердца людей согревала еси, мати Елено всечестная, таже милостынями и смирением главу прегордаго змия непрестанно сокрушала еси, от егоже наветов и нас соблюди твоими молитвами.

Богородичен: Закона исполнение, высшая
Херувим, родила еси Божия Слова воплощена,
Сына Единородна, Егоже о рабех Твоих умоли.

Песнь 6

*Ирмос: В бездне греховней валяся, /
неизследную милосердия Твоего / призываю
бездну: / от тли, Боже, мя возведи.*

Истинный Свет - Христос, яко звезду ты
светозарную, показал есть, мати Елено
всечестная, блуждающим во мраце
путеводящую, во искушениях и вражиих
наветех скорую помощницу.

Исцеления недужным источают святая твоя
мощи, мати Елено, и сих демони трепещут, ихже
насилия свободы и нас твоими богоприятными
молитвами.

Попечения сугубаго о тебе и явления святителя
Тихона сподобилася еси, мати блаженная, егда
утеши ты Задонский чудотворец от скорби
велией, сподвижницу в трудах твоих пославше
ти - Евгению, инокиню всечестную.

Богородичен: Милости Твоея, Богородице,
сподоби мя, премилостиваго Слова рождшая,
своею кровию от тли человеки избавльшаго.

Кондак, глас 4:

Наставленьми святителя Тихона просвещена, /
лесть мира сего отринула еси, / преподобная
мати Елено, / и, якоже некое сокровище, / гроб
Задонского святителя сохраняла еси, / в немже
и по преставлении упокоившись, / жизнь
вечную наследовала еси, мати достоблаженная,
/ и точиши чудеса неоскудно, / память твою
почитающим любовью.

Икос

Возсияла еси, яко пресветлая звезда, во граде
Киеве, преподобная мати Елено, чистым и
непорочным твоим житием, посреде инокинь
совершенными твоими труды и подвиги
прославилася еси: скорби многоразличныя,
гонения и скитания, зависть людскую и злобу
бесовскую мужественне претерпевши, взошла
еси к Вышнему граду, радуящихся и веселящихся.
И ныне честныя твоя мощи, аки сокровище
многоценное, явишася, на исцеление всем,
приходящим с верою и память твою
почитающим любовью.

Песнь 7

*Ирмос: Телу златому премудрыя дети не
послужиша, / и в пламень сами поидоша, / и
боги их обругаша, / среди пламене возопиша, и*

ороси я Ангел: / услышася уже уст ваших молитва.

Радовашеся душа твоя, мати Елено, егда по мнозех летех скитаний обрела еси утешение во обители Флоровстей, еяже добродетельми и чудесы своими обогатила еси.

Избавление от бед и скорбей молитвами твоими испроси нам, чтущим память твою, мати Елено, да взываем: благословен еси, Боже отец наших.

Молитву, воздержание и любовь стяжавши, мати преподобная Елено, иноческаго жития образ явилася еси, в немже преуспевати пособствуй всем, во обители Флоровстей живущим, присным ходатайством твоим.

Богородичен: Тьмою лютою жития объят быв, соскорбящаго и сболезнающаго не обретох: Твоею, Дево, светлостию разреши тьму прегрешений и озари пети Тебе, Благословенная, Яже Бога плотию рождшая.

Песнь 8

Ирмос: Пещь иногда огненная в Вавилоне действия разделяше, / Божиим велением халдеи опаляющая, / верныя же орошающая, поющая: / благословите, вся дела Господня, Господа.

Имать тя заступницу и молитвенницу всяк притекающий к тебе, мати достославная Елено, от напастей бо и бед изымаеши святыми твоими

молитвами.

Егоже от юности всем сердцем возлюбила еси, Христа Бога, Тому во всей жизни усердно поработала еси, мати преподобная, средь многих скорбей прерадостно взывающи: благословите, вся дела Господня, Господа.

Лишения терпящи и точащи слезы, яко ароматы, облаговонилася еси, яко миро многоценное, и возвеличилася еси в терпении твоём пречудном, и Богу принеслася еси дева нерастленна.

Богородичен: Славы Отчую зарю рождши, Богородице, безславием прегрешений сетующее сердце мое уясни, и славы присносущныя покажи мя причастника, яко да верою славлю Тя.

Песнь 9

Ирмос: Безначальна Родителя Сын, Бог и Господь, / воплощься от Девы нам явися, / омраченная просветити, / собрати расточенная: / тем всепетую Богородицу величаем.

Единоумудренно и благочестно вкупе со инокению Евгению пожила еси, мати Елено, в возлюбленной тобою обители Флоровстей и преставилася еси в вечныя обители, отнюдуже призираеши на нас и посещаеши дивными

чудесы.

Ныне с лики Ангельскими на Небесех
предстоиши Владыце всех, всечестная мати
Елено, молящи о граде твоём и обители, и о
чтущих верою святую память твою, недугующим
же подаючи исцеление от честных мощей
твоих, тем Тя поём и величаем.

Образ твой святой целуем, воспоминающе
болезни и скорби твоя, таже добродетельное и
равноангельное житие твое, мати Елено славная,
и, яко живей тебе сущей с нами приносим
похвалы сия и молитв твоих просим.

Богородичен: Нам, поющим Тя и верою
славящим, и божественному Твоему покрову
присно притекающим, подаждь с Небесе
разрешение лютых и мучащих страстей,
Богоневесто, и муки и суда избави.

Светилен:

Предстоще ныне Трисиянному Великому Свету и
пребывающе в неизреченной светлости со всеми
святыми, мати Елено Богомудрая, помяни всех
нас, память твою светносно совершающих.

Слава, и ныне, Богородичен:

Света Превечнаго родила еси нам, Христа, Бога
нашего, Пречистая Дево, избавльшаго весь мир
от лести диавола. Темже молим Тя: не престай

молящи, да подаст нам милость Свою в День Судный.

На хвалитех стихиры, глас 1.

Подобен: Небесных чинов:

Небесных чинов радование / и земнородных
всеславное похваление, / преблаженная мати
Елено, / в твою священную память / верных
собрание благословением осени, / и чудес твоих
благодать нам даруй, / и Христу Богу молися /
даровати душам нашим мир и велию милость.
Солнца светлейши / священная возсия память
твоя, / досточудная мати Елено, / пресветлыми
светлостьми озаряючи всех, / подвиги твоя
почитаючи. / Не престай моляся, блаженная, /
Прославляющему святую память твою / и чудес
сокровище ты всем Даровавшему.

Небеснии чини сretoша тебе, / и правдных
собори возвеселишася, / и от Вседетельных
десницы Владычни венчалася еси, / мати Елено
всечестная, / темже достойно ты величаем / и
раку, идеже лежит честное тело твое, / источник
вемы чудес, / к нейже притекающе, от всякия
скверны и страстей избавляемся.

Воздержанием многим / мудрования плоти
умертвила еси, / преподобная мати Елено, /
душу украсив одеждею безстрастия, / слезныя
капли с непрестанною молитвою совокупила

еси, / прешед умом к Благому Промыслителю, /
от Негоже испроси нам велию милость.

Слава, глас 8:

Приидите, христоименитии людие, / усердно
вси стецемся, / верно торжествуем честную
память матери предивной, / песнями
воспевающе всечестное и равноангельное житие
ея, / и, многоцелебную и чудотворную раку ея
обстояще, / любезно лобызаем, глаголюще: /
радуйся, Богомудрая мати Елено, / града Киева
благодатное прославление; / радуйся,
монашествующих и мирских спасения
ходатаица; / радуйся, яко Троице предстоиши
со Ангелы, / Ея же непрестанно моли о нас, /
любовию совершающих память твою.

Слава, и ныне, Богородичен, глас тойже:
Владычице, приими молитвы раб Твоих / и
избави нас / от всякия нужды и печали.

Славословие великое и отпуст.

НА ЛИТУРГИИ

Блаженны от канона песнь 3-я и 6-я. Прокимен,
глас 7: Честна пред Господем / смерть
преподобных Его. Стих: Что воздам Господеву о
всех, яже воздаде ми? Апостол к Галатам, зачало
213. Аллилуиа, глас 4: Праведник, яко финикс,
процветет, / яко кедр, иже в Ливане,

умножится. Стих: Насаждения в дому
Господни во дворех Бога нашего
процветут. Евангелие от Матфея, зачало 18.
Причастен: Девы да восхвалят имя Господне.

[Текст бденной службы преподобной Елене,
инокине Флоровской, предоставлен для
публикации ее автором, **протоиереем Илией
Тетерько**, клириком г. Одессы]

